

遊東山記

王惲

至元辛巳歲春三月予按部黎陽膏澍連朝明日夏孟丙寅朔
天宇開霽大伾堆阜景明風澹晝如也拉友人宋祺洎諸屬吏
囊筆載酒來遊茲山遂自西南騎而陟阻抵岳祠上旣祝香步
上中層至濛鴻亭址讀刺史邊元勳亭記文甚奇麗稍北至中
頂頂勢夷衍卽李魏公中帳蓋伾之絕巔也山形再成峻層石
壇爾東北行百步陰崖崎嶇扶掖而下憩龍竇巔上少焉降觀
西陽明洞記開元間山人李真題名筆勢飄逸有焦山鶴銘風
格其龍巖方廣天然而龕上竅極大盤旋若螺殼然遂頂而去
窈不知其幾何也意者山澤通氣此正大伾口鼻哈呀吐納之

道藏輯要

天下名山記
直隸東山王

九

軫集一
x b 三

所非有異也宣和以侯爵錫之不幾于妄濫乎盤礴久之下山
適靈昌諸君繼至尋前盟也相與稽首彌勒真象具鐫鑿本末
以寺石麟考之爲高齊所造無疑左右磨崖題識甚多得魯元
翰張浮休賦詠各一周覽旣已與客連鑣東行踰大河故瀆入
牽城登紫金山觀仙人拖裙石石水蒼色苔昏雨溜雲華漬裂
誠若辟績狀者其面有元豐政和題記黥刻幾滿皆奇筆也遂
探白金泉瞰玉女洞口旁勒建安人徐閔中泉眼銘雨蘚模糊
略辨首尾於是躋巔會勝主人取軟腳例開樽連酌觴詠纔交
幽懷共暢不知山蹊之迂登頓之勞也旣而寒日下悲風來逕
北麓穿蒼城按觀隋唐廩制未刻入自北門晏羣賓于清白堂

酒數行張鄭諸君舉觴囑予曰今日之遊樂且有融盍簪而來似非偶然第遷變已來三山濯濯等爲邱垤其能極宣城之賞當子長之遊乎然山以賢稱境緣人勝如赤壁斷岸也蘇子再賦而秀發江山峴首瘴嶺也羊公一登而名垂宇宙况茲山也名載夏書功存禹迹關河大地形勝依然斯行也垂橐偕來稱載而去幸吾子筆之歸爲兩郡光且紀蒼烟寂寞之會仍得造名其間爲他年林下故事非偶然者不爾結塵客迴俗駕幾何不爲壘嶂攢譏山林見謝也耶

道藏輯要

天下名山記
直隸東山王

十

軫集一
一丈三